

Fronda

Voandeira do Arquivo Histórico Provincial de Ourense


Nº 20

Ano 3

xaneiro-febreiro 2009

BICENTENARIO DA INVASIÓN DE GALICIA POLAS TROPAS NAPOLEÓNICAS

Na Fronda número 16 conmemorouse o bicentenario da creación a principios de xuño de 1808 da **Xunta de Defensa e Arma-**



1809, marzo, 14. Boborás.

Minuta da orde-circular remitida polo capitán Bernardo González «Cachamuíña» a párocos e xustizas de distintas xurisdiccións ourensás para que fagan presentarse aos desertores e para que confisquen armas a aqueles individuos que non participen na loita contra os franceses.

Orixinal; papel; escritura humanística; castelán; 1 fol.; 215 x 314 mm; Boa AHPou, Casa de Lorenzana, caixa 9737

mento de Ourense, nacida como resposta á ocupación da Península Ibérica polas tropas napoleónicas. Non obstante, ata xaneiro de 1809 os franceses non pisaron territorio galego. Comandados polos mariscais Soult e Ney, entraron en Galicia perseguido ao exército do Marqués de la Romana e ás tropas inglesas do xeneral Moore que se batían en retirada. En quince días os invasores foron ocupando as vilas e cidades galegas sen atopar apenas resistencia.

Ao tempo que o minguado e exhausto exército do Marqués de la Romana se ía internando na provincia de Ourense, moitos soldados foron desertando polo camiño. La Romana comisionou, entre outros, ao capitán de granadeiros **Bernardo González del Valle «Cachamuíña»** para que procedese á reorganización do seu exército a través da reunión e reincorporación dos soldados que se foran dispersando e, ademais, para que vixiase os movementos das tropas francesas en Ourense e arredores.

Precisamente, o documento ao que se lle dedica este número de *Fronda* é un **orde-circular** remitido por «Cachamuíña» a distintos párocos e xúices para que «**hagan presentar a todos los soldados dispersos** de sus respectivas jurisdicciones». Tamén ordena a todos aqueles que non participen nas actividades de defensa, que lle **entreguen as armas** que teñan ou as que lle foran subtraídas aos franceses.

Con quartel xeral en **Boborás**, parece que o capitán González cumpliu con eficacia a encomenda e algunas fontes falan –quizá esaxeradamente– do recrutamento dun continxente de 4.500 homes que se incorporou ao exército de la Romana acantonado no **val de Monterrei**. Pero a sona de heroe gañouna sobre todo pola súa participación na «reconquista» da cidade de **Vigo**, onde se lle atribúe unha acción épica que anualmente se conmemora nesta cidade.

de vnu...
dos 22º. Dado en el Cuartel General de Boborás a diez dias
del mes de marzo año de mil ochoz eys y meys. Reencan-
ga a Siray Turtar la pronta conducción y ejecución de los efectos
reales en poder de Gregorio Muniz o su substituto.

Bernardo González

En copia de la orden. Circulan q. facovo & reabre la q. inmediata
tamén se dirixiálos cuny Parrocos & era manda q. se instruian
de ella despachando al conductor sin detenerle mas tiempo
q. el q. necesiten p. a lealle anotando el recibo a su continua.
Roucos marzo 11. 1809 M.

Os movementos de tropas en Ourense

Na súa retirada desde a Maragatería, o exército de Galicia ou «Ejército de la Izquierda», como se denominaba ás tropas comandadas polo Marqués de la Romana, entrou en territorio galego por Valdeorras, pasou por Trives e acampou brevemente na cidade de Ourense a principios de xaneiro de 1809. Consciente da súa vulnerabilidade e sabendo da inminente chegada das tropas napoleónicas, abandonou a cidade cara ao val de Monterrei para evitar o confrontamento directo cos franceses que en anteriores encontros lle fixeran prisioneiros a case 3.000 soldados. Por iso, cando o **20 de xaneiro de 1809** os invasores chegaron a Ourense, ocuparon a cidade sen resistencia.

Desde o val de Monterrei, La Romana, recoñecido como máxima autoridade de Galicia, intentou dirixir as accións antifrancesas en todo o reino en coordinación coas reconstituídas **xuntas locais de Defensa** e coas partidas de guerrilleiros.

O día 23 de xaneiro varias unidades militares francesas saíron de Ourense cara Portugal para abrillle camiño ao continxente militar que ao mando de Soult planeaba entrar no país veciño. En Allariz e Xinzo atoparon focos de resistencia que foron derrotados co custo de moitas vidas e o saqueo das dúas vilas. Cando os franceses alcanzaron o val de Monterrei, o exército de La Romana xa tomara rumbo cara a **Puebla de Sanabria**.

A resistencia popular: xuntas e alarmas

Ante o entreguismo das autoridades da maioría das vilas e cidades e a desmembración e debilidade do exército de Galicia, xurdiu no ámbito rural un **movimento popular de resistencia** concretado, primeiro en accións espontáneas, e logo mediante a constitución de partidas de guerrilleiros sometidas a disciplina militar que recibiron o nome de «alarmas».

Este movemento foi alentado e liderado por membros das **élites do Antigo Réxime** aos que secundaron os restantes grupos sociais que vían con impotencia e arrepío as atrocidades do invasor. **Cregos, monxes e fidalgos** capitanearon «alarmas» de **campesiños** que aproveitaron a morfoloxía física de Galicia para fustrigar sen descanso ao exército fran-

cés. Dificultaban ou impedían a circulación dos invasores polas principais vías de comunicación co fin de incomunicalos co alto mando e co goberno de Xosé I. Con esta estratexia conseguiron desorientar e desorganizar aos exércitos imperiais que, acantonados nas cidades, se viron incapaces de controlar o territorio.

No sur de Galicia organizáronse **pequeños exércitos**, como o capitaneado por Cachamuíña ou os comandados polo **párroco do Couto** e o **abade de Villadares** respectivamente, que tras sucesivos éxitos guerrilleiros tomaron a iniciativa de asaltar as cidades.

Derrotas como a «reconquista» de Vigo ou a **batalha de Ponte Sampaio**, a paulatina perda das cidades e a desastrosa estratexia militar de Soult e Ney fixeron insostible a permanencia militar francesa en territorio galego. O **30 de xuño de 1809** os exércitos de ambos mariscais xa abandonaran Galicia.

«Cachamuíña», heroe da reconquista de Vigo

Bernardo González del Valle, alias «Cachamuíña», é un persoero anualmente recordado na cidade de Vigo polo seu papel heroico na «reconquista» ou liberación da cidade.

Nacera en 1771 no seo dunha familia fidalga e ao igual que o seu pai seguira a carreira militar. O alcume polo que é coñecido procede da súa localidade natal, Cachamuíña, situada no actual concello do **Peireiro de Aguiar**.

En xuño de 1808 a **Xunta Suprema de Galicia** destinárao a Ourense con grao de capitán de granadeiros e, tras a ocupación de Galicia en 1809, o marqués de la Romana nomeárao *Comandante de los Paysanos Armados*. Con cuartel xeral en Boborás, na **xurisdición de Roucos**, recrutou, organizou e equipou con armas e munición aos campesiños da comarca que se converteron nun foco de resistencia que acadou sona en toda Galicia tras protagonizar distintas fazañas bélicas.

Despois de participar co seu exército de voluntarios na liberación de Pontevedra o 24 de marzo de 1809, assistiu ao cerco da cidade de Vigo que se iniciara a principios dese mesmo mes. O 27 de marzo, durante o asalto á cidade, dise que o propio Cachamuíña, pese a recibir varios impactos de bala, conseguiu abrir a machadazos a **porta de Gamboa**. Este heroico feito permitiu penetrar ás milicias populares na cidade e forzar a capitulación dos franceses. En recompensa foi nomeado **gobernador militar de Vigo**.